

Imm. 2 taamaasilluni imm. 6-iulissaaq.

2. § 19, *imm. 2-mi* ”40.000 koruuninik” allanngortissaaq imaalillugu: ”60.000 koruuninik”.

3. § 19, *imm. 3-mi* ”20.000 koruuninut” allanngortissaaq imaalillugu: ”30.000 koruuninut”.

4. § 19, *imm. 4-mi* ”10.000 koruuninut” allanngortissaaq imaalillugu: ”15.000 koruuninut”.

5. Nutaatut § 22 a ilanngunneqassaaq:

”§ 22 a. Selskabi § 1, *imm. 1*, nr. 3-mi pineqartunut ilaasoq, § 22, *imm. 2-mi* taaneqartunik annertussutsinit annikinnerusumik akileraartarnermi nalikilliliisarsimappat, selskabip nalikilliliinermi killiffigisai, selskabip pigisaasa § 22, *imm. 2-mi* annertussutsinut taaneqartunut nalikillilersimasinnaanerinit appartinneqassaapput, matuma ataani taaneqartunik pisoqartillugu:

1) Aktiatigut piginneqataassutigigulluunniit aningaasaatit 30 procentii amerlanerusulluunniit ukiup aningaasarsiorfiup naanerani ukiup aningaasarsiorfiup pineqartup aallartinneranit aktiaateqartunit imaluunniit peqataasunit allanit pigineqalersimappata,

2) Selskabimi aktiat taasisinnaassuseqarnerilluunniit agguataarsimanerat ukiup aningaasarsiorfiup ingerlanerani, ukiup aningaasarsiorfiup siuliani agguataarsimanerannut sanilliussinermi, annertuumik allannguuteqarsimappat,

3) Selskabip suliai ukiup aningaasarsiorfiup ingerlanerani, ukiup aningaasarsiorfiup siuliani suliarisimasaanit annertuumik allanngorsimappata,

4) Selskabi allanik kattuteqateqarsimappat, agguataarneqarsimappat allatulluunniit assingusumik allannguuteqartinneqarsimappat.

Imm. 2. Imm. 1-imi aalajangersagaq atuutinngilaq

1) selskabinut børsenimi nalunaarsugaasunik aktiaqartunut, imaluunniit

2) § 57-imi aamma § 58-imi taaneqartut piginnittuuneq kinguaariinni tullernut nikinneqarsimappat.

Imm. 3. Selskabimi imm. 1-imi pineqartunut ilaasumi aningaasaatit 25 procentii amerlanerusulluunniit selskabimit allamit, peqatigiiffimmit imaluunniit taakkununga assingusumit (selskabimit piginnittuusumit) pigineqarpata, selskabimi piginnittuusumi aktiaateqartut peqataasulluunniit, selskabimi aningaasaatinik piginneqataanermik annertussusii naapertorlugit, selskabimi pigineqartumi aningaasaatinik piginnittutut isigineqassapput, selskabimi piginnittuusooq pinnani. Tamannali atuutinngilaq selskabip piginnittuusup aktiai børsenimi nalunaarsugaappata.

Imm. 4. Naalackersuisut imaluunniit Naalackersuisut tamatumunnga pisinnaatitaat, pissutsit immikkut ittut tamanna inassutiginarlippassuk tamakkiisumik ilaannaasumilluunniit imm. 1-imi aalajangersakkanit allaanerusumik immikkut akuersissuteqarsinnaapput.”

6. § 75-imi, *imm. 3, nr. 2* imatut oqaasertaqassaaq:

”Kingornussarsiassat, peqatigiiffiit tamat iluaqutissaattut tamanulluunniit ajunngitsuliutaasutut ingerlatsiviit, Kalaallit Nunaanni nalunaarsugaanngitsut, takuulli § 76, *imm. 4.*“

7. § 81, *imm. 3-mi* oqaaseqatigiit siulliit tuliisut ilanngunneqassaaq:

”Nassuiaatit Kalaallit Nunaanni suliarineqassapput. Paasissutissat sukumiisumik nassuiaatip suliarineqarneranut tunngaviusut kiisalu paasissutissat akileraaruseriffiup aningaasarsiat A-nik tunniunneqartunik mississuinissaanut pisariaqartut Kalaallit Nunaanni toqqortaagineqassapput. Oqaaseqatigiinni siullermi aappaanilu taaneqartut atuutinngillat nunap akileraarutinik unerartitsinissamut pisussaaffeqartup nunagisaa Kalaallit Nunaatalu akornanni Kalaallit Nunaannut akileraarutinik unerartitsinissamik isumaqatigiissuteqartoqarsimatillugu.“

§ 2

Inatsit 1. januar 2010-miit atuutilissaaq, takuulli imm. 2.

Imm. 2. Inatsisissatut siunnersuummi nr. 5 ullormi 25. september 2009-mi atuutilissaaq.

Imm. 3. Suliffeqarfiit, aningaasarsianit akileraarutit pillugit Inatsisartut inatsisaanni § 2, imm. 2-mi pineqartunut ilaasut, takuuk inatsimmi tassani § 1, nr. 1, inatsisip atuutilinnginnerani Kalaallit Nunaanni aatsitassatigut pisuussutinik misissueqqaarnermut, misissueqqissaarnermut aammalu piiaanermut, matumani aamma Kalaallit Nunaata imartaani aammalu Kalaallit Nunaata nunavittaata immap ataaniittup nalaani, aningaasartuuteqarsimasut ukiumut aningaasarsiorfiusumut 2009-mut ukiunilu aningaasarsiorfinnut siuliinut aningaasarsiatik akileraaruteqaataasussat ataatsimoortillugit naatsorsorsinnaavaat. Aningaasarsiat malittarisassat aalajangersimasumik ingerlatsivinnut atuuttuusut malillugit naatsorsorneqassapput, takuuk § 2, imm. 1, nr. 10, aammalu § 2, imm. 6-imi malittarisassat malillugit. Taamaaliornikkut amigartoorutit naatsorsorneqartut § 30-mi malittarisassat malillugit saqqummiunneqarsinnaapput, aningaasarsianillu akileraaruteqaataasussanit naatsorsorneqartunit ilanngaatigineqarsinnaallutik. Aammattaaq aningaasarsianit akileraarutit pillugit Inatsisartut inatsisaanni kiisalu akileraaruserinermik ingerlatsineq pillugu Inatsisartut inatsisaanni aalajangersakkat taamatulli atuupput.

Kalaallit Nunaanni Namminersorlutik Oqartussat, ulloq xx. xxxx 2009

Kuupik Kleist

/

Palle Christiansen